

17 SEP 1997

Ling-Kargo

TINGKATKAN PENGGUNAAN KEMUDAHAN PENGENDALIAN KARGO TEMPATAN

KUALA LUMPUR, 17 Sept (Bernama) -- Kerajaan telah menetapkan supaya kargo-kargo dari negara ini dikendalikan melalui pelabuhan dan lapangan terbang tempatan, kata Menteri Pengangkutan Datuk Seri Dr Ling Liong Sik hari ini.

Katanya jika pekilang tempatan mengelak daripada menggunakan kemudahan pengendalian kargo di pelabuhan dan lapangan terbang asing, ia dapat mengurangkan aliran keluar wang negara melalui pertukaran matawang asing dan dapat membantu kerajaan mengurangkan defisit dalam imbalan pembayaran negara.

"Kita sedang mengkaji beberapa langkah untuk memastikan prinsip ini diikuti dengan baik oleh para pekilang tempatan," katanya kepada pemberita di pejabatnya di sini.

Dr Ling berkata kemudahan pengendalian kargo tempatan kini cekap, berproduktiviti tinggi dan melibatkan kos yang rendah berbanding kemudahan seumpama itu di negara asing.

Katanya 30 peratus pekilang tempatan masih menggunakan pelabuhan asing dan berharap mereka yang terlibat memberikan sokongan penuh terhadap dasar kerajaan itu.

Menyentuh lawatan beliau ke Mongolia dan Kyrgystan bersama-sama Perdana Menteri Datuk Seri Dr Mahathir Mohamad minggu lepas, Dr Ling berkata beberapa pegawai Mongolia akan dijemput ke Malaysia tidak lama lagi untuk menandatangani perjanjian perkhidmatan udara antara kedua-dua buah negara.

Katanya mereka juga akan berpeluang melihat serta mempelajari aspek kemudahan pengangkutan yang lain seperti sistem lapangan terbang, keretapi dan jalan raya.

Beliau berkata Malaysia juga bersedia membantu Mongolia, sebuah negara yang dikelilingi sepenuhnya oleh daratan, mendirikan pelabuhan dalaman bagi membantu negara itu menarik pelabur asing dan memudahkan pengendalian import dan eksport barangannya.

Dr Ling juga berkata Kementerian Pengangkutan bercadang menyediakan sebuah kereta Proton Perdana untuk kegunaan beliau sebagai menyahut saranan kerajaan supaya kementerian dan agensi kerajaan menggunakan kenderaan buatan tempatan. -- BERNAMA

MAM AKD